

LA CARTA A LOS HEBREOS

Jesucristo mii ño Dios cheẽ mbuchecua nguiã

1 ¹Dios que ucheẽ mbiasa asa tuchi quia mbia nandei ñiinda je cose ra. Hue rĩ ji eã ngue eriqui ucheẽ mbiasa asa ee ra. Dios cheẽ mbuchecua checuasa atate que aque mose ra. ²Eĩ eã ño namo nde. Jesucristo mii ño Dios cheẽ mbuchecua checua nguiã nande je co cote. Dios nguiirĩte mbucheẽ nande je cote. Ae mii ndese chõ ngue Dios ibi ao nyii ra. Dios que emii mbae ja rerecuarã nda. ³Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandeicuã mbutiã sacuã nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴Jesucristo quia rei i tuchi ángeles si. “Seriirĩ tuchi” i chõ Dios nguiã ee. ⁵Á ngue Dios ñee áte ángeles mo je ra:
Seriirĩ ño nde re.
Ndereco que amee ndeje ra,
i áte que Dios ángeles mo je ra.
Nderu chõ se re.
Seriirĩ ño nde re,
i áte que Dios ángeles mo je ra. ⁶Dios nguiirĩ mbu mose íbii que ñee nda:
Sã ángeles riqui adorar i ja seriirĩ je,
i que ra. ⁷Á ngue Dios ñee ángeles riĩ nda:
Quiririã tu asi rã tuchi chõ ángeles re.
Serimba chõ ángeles re.
Tata rendi rã tuchi,
i que Dios ñee ángeles riĩ nda. ⁸Nguiirĩ je quiatu que ñee ã nda:
Nde rei Dios. Ererecuarã mbei ra nde.
Ererecua turã tuchi ereico nde co.

- 9 Mbae turã eresaã sete quia co.
 Mbae icuã nguia erechosei chiãte nguã.
 Nyebe Dios riqui nguã nembia tuchi nderesenda mo si.
- 10 Nde que mbae erechao ja tuchi ibi jenda nyii ra.
 Ndeo je que ibei erechao no nda.
- 11 Ũquĩ nda ua ja chee.
 Nde quia ra ereico bei.
 Tiru ìma na ja chee ra ũquĩ.
- 12 Sã mbia riqui tiru ìma mombo no.
 Eyasu rerequia erendaque re.
 Eĩ si ra ibi cote. Ibei abe no.
 Nde quia ra eĩ mbei ereico.
 Eremanoa mbei ra nde quiatu,
 i que Dios ñee Jesucristo je ra. 13 ã ngue Dios ñee ãte ángeles mo je ra:
 Ecoi seji. Nde abe ra ererecua serese.
 Ae ndeucuãyãte quia nae, ũquĩ je ra ndequirãcuã atecuquia tuchi.
 Ndequirãcuã tuchi chee ra ũquĩ si,
 i ãte que Dios ángeles mo je ra. Jesús miĩ je que ñee ũquĩ nda. 14 Dios ririĩ
 eã ño ángeles re. Dios rimba chõ ñene. Ae ra Dios mingo bei, ũquĩ ndaarõ
 sacuã ño ngue Dios ángeles miĩ nguã.

Nandeichayã sacuã Dios icha si

2 1 Ae nandechandu quia Dios cheẽ nae, ũquĩ ndese nandeico ndua
 tuchi. Ī nda nandeichayã mbei Dios icha si. 2 Ae riĩ ángeles riqui ñee
 mbia je cose nae, ñee ñooñoa tuchi chõ ñene. Ae ũquĩ ñee mumba nae,
 mbae rasi que esaã cote ra. 3 Jesucristo sí que ñee nda. --Mbia tamingo
 bei, i que ra. Mbia que echeẽ senei senei mbiasa nande je cote ra. Nande
 echeẽ mumba mose ra mbae rasi nandesaã tuchi nande quiatu cote.
 4--Jesucristo ñee ñooñoa ño nguia re, i sacuã mbia que Dios mbia mae
 sayã naa naa nda. Milagros tubiriã. --Jesucristo ñee ñooñoa ño nguia re,
 i sacuã mbia que Dios Espíritu Turã mondo mbia je no nda. Ae je Dios
 Espíritu Turã mondo mondo sete nae, ũquĩ je chõ ngue Espíritu Turã
 mondo ra.

Mbia rã ngue Jesucristo ru nyii ra

- 5 Ae ra nandeso emo mose nae, hue jenda rerecua eã nda ángeles. 6 Sã
 embesa ji ñi ñee ã no:
 ¿Mbaerã ereico nduate mbia rese re, Dios?
 ¿Mbaerã ereico eraarõ tuchi re?
- 7 Angeles que eremingo turã tuchi rei mbia si aque mose ra.
 Ũquĩnde ereico bei mbia mingo turã tuchi ángeles si co cote.
 Mbia que eremiĩ mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremii ja mbia mbaerã nda, i embesa ji huĩ ñee a. --Mbae rerecuarã ja ra mbia, i mose Dios, mbae ja riĩ ño ñee nguiã. Mbae mbia cheẽ mumbate raque quia ã. ⁹ Jesús mii ndese chõ nandeico nguiã mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra. Dios que mbia mingo bei sete ra. Nyebe “emano mbia riĩ” i nguiã Jesús je. Emanonde que Dios emii mbia rerecuarã tuchi cote ra. ¹⁰ Dios que mbae chao ja tuchi umbaerã nda. Nyebe mbae rasi raanguquia tuchi nguiã Jesús je cote. Mbia tubiriã mingo bei sacua ño ũquĩ nde. Jesús mbae rasi raã mose, ererecua turã tuchi sacua ño ũquĩ nde. ¹¹ Jesús que nandembitirõ uturã na sí ra. Nyebe eru riqui nguiã nanderu ja co cote. Nyebe Jesús riqui nguiã “senongue” i irei nguiã nande je. ¹² Sã Jesús cheẽ ñi embesa ji rese a no:

Paba ibatenda tasenei senongue je.

Senongue rese tairasei rasei ee,

i que Jesús cheẽ mbesa ji huĩ nda.

¹³ Dios taicua tuchi,

i abe que Jesús cheẽ huĩ nda.

A aico seriirĩ Dios chimondo rese a,

i abe que Jesús cheẽ huĩ nda. ¹⁴ Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacua. ¹⁵ Ae siquiche beite quia umano si nae, mbae icuã nimba raanguia chõ ũquĩ nde. ũquĩ siquiche eã sacua ño ngue Jesús mano nguiã. ¹⁶ Angel sacua eã ngue Jesús ru ra. Mbiarã ño ngue eru nguiã. Judiorã ño ngue eru nguiã. Mbia mbitirõ sacua. ¹⁷ Nyebe Jesús ru nguiã mbiarã nande rã. Ñee turã sacua Dios je nande riĩ. Dios nandembasi eã sacua nandeicuã nii. Jesús siqui mose mbiarã ngue mano mbia icuã nii nda. Mbia icuã mbutiã sacua esi. ¹⁸ Mbae icuã ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icuã tã i mose nande je.

Jesús quia rei i tuchi Moisés si

3 ¹ Seresenda, Dios que jemii icúe umbaerã tuchi ra. Nyebe aico nguiã ñee tuchi Jesucristo riĩ jêje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote. ² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si. Ae que Moisés chao ra. Sã emo ndiqui tuchua ao no. Tuchua aosa quia rei i tuchi tuchua uchiao si. ⁴ Mbia mo tuchua chao arondete raque. Dios mii nguia rei mbae ao ja tuchi. ⁵ Moisés

que Dios cheẽ mumba eãte rei quia ra. Erimbachõ ño ngue ae ra. --Ã nda Dios saã je mbia je, i chõ ngue Moisés quia ra. ⁶Cristo quia rei i tuchi Moisés si. Ae quia rei Dios ririĩ tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyoĩ Dios récuua

⁷Jesús quia i tuchi re. Nyebe Espíritu Turã ndiqui nguiã ñee nande je ã:
Dios cheẽ jeñandu rã namo.

⁸Jeñia átãte ra jẽingochĩ jẽ.

Sã cose ndare chiã átã mbeite riqui Dios cheẽ andu sereã turúquiaa eico mose no.

Ûquĩ icuãte que eriqui Dios je ra.

Dios que ñimbirãcuã ñote quia ee ra.

⁹Dios que siqui mingüete quia ùquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui mingüete nande je”, i rei que mbia jenamei nguia cose ra.

¹⁰Nyebe Dios paama i nguiã ñee ee.

“Siqui icuã mbeite equia uchiangui re ã. Siqui sereãte equia seicha rui ã.

¹¹Aico paama ite ee co.

Uquenea nda eucua eã mbei nyoĩ serécuua”, i tuchi que Dios eriĩ nda, i que Espíritu Turã ñee embesa ji huĩ nda. ¹²Cochee chõ jẽingo, Seresenda. Jẽicha eã sacua Dios reco si jeñiangui re. Dios jẽicua bei sacua jeñiangui re no. ¹³--Nandeico i i tuchi quiatu quia Dios rese, jenyee jenyee bei quiatu quia jenyue. Jendeco mose íbii. Ì nda mbae icuã jembiĩrĩ irĩ eã. Ì nda jẽteã teã eã Dios cheẽ je no. ¹⁴Sã nande Cristo nandeicua raque nyii no, eĩ nande bei chõ nguia eicua i i. Ûquĩ mose ra Cristo resenda tuchi nande cote. ¹⁵Sã embesa ji riqui ñee ã no:

Dios cheẽ jeñandu rã namo.

Jeñia átãte ra jẽingochĩ jẽ.

Sã cose ndare chiã átã mbeite riqui Dios cheẽ andu sereã turúquiaa eico mose no,

i que embesa ji ra. ¹⁶¿Aba chõ Dios cheẽ ñandu sereã eandure cose chã? Ae Moisés querao Egipto si nae, ùquĩ ño ngue resẽ. ¹⁷¿Aba je chõ Dios paama i cuarenta años cose chã? Ae mbae icuã saã saã nae, ùquĩ ño ngue resẽ. Nyebe mano mano nguiã turúquiaa. ¹⁸¿Aba je chõ Dios ñee tuchi chã? --Jenguenea nda jẽucuayã mbei oso serécuua, i chã. Ae echeẽ mumba quia nae, ùquĩ je chõ ngue re. ¹⁹Nyebe ngasẽ eã nguiã Dios récuua. Dios icua eãte quiatu ngue re.

4 ¹—Ae seicua quia nae, ũquĩ nda nyoĩ serécuaa, i chõte Dios quia nande je co. Nyebe nandeico cochee. Cochee jëingo eã mose, jemo jengasẽ eã arõte Dios récuua. ²Nande abe je chõ Dios riqui nguiã ñee co. —Ae seicua quia nae, ũquĩ nda nyoĩ serécuaa, i. Moisés reco mosenda achõ je eã ño ngue ñee nguiã. Ũquĩ ngue Dios chandu iru chooño nda. Dios icua rocoĩ. ³Ae Dios icua quia nae, ũquĩ achõ ño nda nyoĩ ngasẽ Dios récuua. Uquenea ucua sacuañ huee. Dios que ñee tuchi ucheẽ andu sereãsa je cose ra:

Aico paama ite ee co.

Uqueneã nda eucua eã mbei nyoĩ serécuaa, i que ra. —Ma siqui serese, i bei rei que equia eraarõ arõ nda. Ibi ao mosenda bei. ⁴Ã mbesa ji que chĩ nda:

Dios mbae ao jare que uqueneã ucua séptimo día ra, i que embesa ji ra. ⁵Ã abe que chĩ embesa ji rese ra:

Uquenea nda eucua eã mbei nyoĩ serécuaa, i que embesa ji huĩ no

nda. ⁶Emo emo abe ra Dios icua. Siqui sacua erécuaa. Ae Dios cheẽ ñandu nyii nae, ũquĩ ngue Dios icua eãte ra. Nyebe ngasẽ eãte nguiã Dios récuua. Dios cheẽ nguiatu ngue emumbate nguiã.

⁷Nyebe Dios riqui nguiã ñee nande je quiatu co. Nandeico sacua erese namo. Ũquĩ echeẽ mumbare nyii. Sã David Dios cheẽ mbesa no:

Dios cheẽ jeñandu rã namo.

Jeñia átãte ra jëingochĩ, i que Dios ra,

i que David embesa ra. ⁸Josué que mbia isrealitas mii aroneate Dios récuua ra. Uqueneã ucua sacua. Ì nda Dios ñee ãte rei. —Taemingo serécuaa jenguenea ucua sacua, i ãte rei. ⁹Nyebe ra Dios quiato nyoĩ ngasẽ Dios récuua. Huee ra uqueneã ucua tuchi huee cote. ¹⁰Ae ra ngasẽ Dios récuua nae, ũquĩ nda uqueneã ucua tuchi. Sã Dios uqueneã ucua tuchi mbae ao jare no.

¹¹Nandechimbirãcuã tuchi oso nonde Dios récuua. Nandequenea ucua sacua. Ae Dios icuayãte quia cose nae, ũquĩ na nda nandeicochĩ nande mo namo jẽ. ¹²Dios cheẽ nguiã rei ereco tuchi. Equirãcuã tuchi. Ique tuchi aba chianguí re. Sã tiquise rimbe riqui ique chõte oso no. Eĩ si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chioseĩ oseĩ abe mbuchecua tuchi aba je no. ¹³Mbae mo ndese Dios riqui jirandu eã eãte co. Mbae mo nandesã nyecuayã cuayã aroneate quia esi ã.

Jesús ñee turã mbei Dios je nande riĩ

¹⁴Jesús rei Dios riirĩ tuchi. Sacerdote rerecua tuchi chõ eriqui nguiã nande je co. Oso que ibate Dios rea ñee ñee sacua nanderiĩ nda. Eriqui ñee ñee mbei Dios je nanderiĩ co. Nyebe nandeico tuchi quiatu quia

erese. ¹⁵Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguiã nyii. “Ma Jesús mbae icuã naa” i nguiã. Mbae icuã ngue Jesús saã eã mbei chõ nda. ¹⁶Nyebe nandesiquicheã nguiatu quia Dios riichã. Nyesecuate quiatu nguiã nanderese co. Nandesiquicheã nguiatu quia ñee ñee ee. Eya eã sacua nanderese. Uquirãcuã mee sacua nande je, diablo tã i mose nande je.

5 ¹Sacerdote rerecua judío mbae rei mbia chõ. Ae chõ ñee turã mbei nguiã mbia riñ Dios je. Ae chõ mbae quishĩ ji mondo mondo nguiã Dios je. Dios mbia chisaã saã icuã mbutiã sacua esi. ²Sã sacerdote rerecua abe riqui mbia nande rã si no. Nyebe eriqui nguiã siqui tochte mbia quirãcuã nea je. Mbia aquiatuã je abe. Mbia icha icha je abe no. ³Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicuã mbutiã sacua esi. Mbia chisaã icuã abe mbutiã sacua esi no. ⁴“Sacerdote rerecua se” i aroneate emo, Dios eirabo eã mose. Dios ae que sacerdote mii mii nda. Sã Aarón mii cose no. ⁵Ei si que Cristo ra. “Sacerdote rerecua se” iã ngue ae ae ra. Dios quiatu ngue emii nguiã. Sã Dios cheẽ mbesa ji riqui ñee no:

Seriirĩ ño nde re.

Ndere co que amee ndeje ra,

sã Dios i ñe e ee no. ⁶Sã embesa j i mo ndiqui ñee no:

Sacerdote bei rei nde.

Melquisedec na tuchi ereico nde co,

sã embesa ji riqui i no. ⁷Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra. ⁸Dios ririite raque Cristo. Mbae rasi que esaã tuchi ra. Ñimbaaquiatu chõ ngue equia ũquĩ ndese Dios cheẽ mumbayã nda. ⁹Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ũquĩ emingo bei quia co. ¹⁰Dios quiatu ngue emii nguiã sacerdote rerecuarã. Melquisedec na si no.

Jeñimbaaquiatuã mbei chõchĩ equia Cristo rese ã

¹¹—Mbae tasenei tuchi Jesucristo riñ jėje, ae rei que se ra. Jê nguia secheẽ jeñandu sereate nguiã. Nyebe aico nguiã embiasa asa aroneate jėje co. ¹²Cosete que jëingo rei Jesús icua resẽ. ¿Mbaerã jëingo ñimbaaquiatuã mbeite re? Í nguia nda jëingo nguiã emo mbaaquiatu quiatu chã. Jëaquiatuã mbei chõchĩ. Dios cheẽ aba chiicua jëicuayã mbei chõchĩ. Ñquẽ na ño jëingochĩ ã. Sã ñquẽ ndiqui usi quiandi achõ mbei no. Soo quiatu eu aroneate nguiã. ¹³Ñquẽ na jëingo bei mose, jëaquiatuãte siqui mbae turã ndese. ¹⁴Ae ñimbaaquiatu quiatu tuchi quia Cristo riñ nae, ũquĩ nguia rei mbae turã icua tuchi, mbae icuã icua rocoĩ. Mbia cuasu rã ño ũquĩ nde.

6 ¹⁻²Ae rese jeñimbaaquiatu nyii nae, aba chiicuate ũquĩ. Ũquĩ miite rese jëingochĩ nguiã. Mbae aba chiicuayã mo abe jëicua jiri Jesús riĩ ae. ã aba chiicua que asenei ja jëje nyii ra: —Jenyisaã mbae icuã si jëhui, ae que jëje nyii ra. —Dios jëicua, ae que jëje nyii no nda. Bautismo abe que asenei jëje nyii ra. —Jëo jeñono Jesús quiato arõ, ae que jëje nyii no nda. —Mbia raque ra quera si, ae que jëje nyii ra. —Mbia Dios quiatoã nda mbae rasi saã tuchi tata cuásuu, ae que jëje nyii no nda. ³Ũquĩ aba chiicuate riqui ã ndesẽ. Aba chiicuayã tasenei jëje cote, Dios “eno” i mose. ⁴Emo emo ngue siqui rei Dios quiatorã nyii ra. Dios chimee icua raque nyii. Espíritu Turã abe icua raque nyii no. ⁵Dios cheẽ turã abe icua raque nyii. Dios quirãcuã abe icua raque nyii no. ⁶Ũquĩ hui mose Dios si, uba si aroneate erese cote. Jesús mbucha si chõ nguiã ira rese ũquĩ. Iquia iquia chõ nguiã Jesús je mbia résaã ũquĩ. ⁷Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸Ñui achõ suri mose huee, eicuãte ũquĩ. Eĩ si chõ mbia Dios cheẽ andu chooñosa no nde. Eicuãte ũquĩ. Ũquĩ nda Dios mombo chõ tata cuásuu.

Dios ra ucheẽ mbuchebiã mbei

⁹Jenii aico nguiã ñee eã, Seresenda. Dios cheẽ jeñandu chooño eã nguia jë ndeae. Jesús jëicuate quia ũquĩ. Nyebe jëingo tuchi quia erese ũquĩ ndeae. ¹⁰Dios turãte eriqui co. Tesareiaã nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ũquĩ. ¹¹Eĩ jenye bei quiatu equia nyesecua bei emo ndese. Ì nda Dios mbae mee tuchi je jëje. ¹²Jeñimbiratã mbei chõ nguia mbae raã jë. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguiã ee. Eriqui beite mbae mee mee ee co.

¹³⁻¹⁴Sã Dios ñee Abraham je cose no: —Taico turã mbei ndeje. Nderiirĩ nducucha tubiriã ndae, sã i Dios Abraham je no. Ũquĩ mose que Dios jurar i umbae nombre riĩ nda. ¹⁵—Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eriirĩ mondo chee ee ucheẽ nguire cote ra. ¹⁶Mbia jurar i mose, Dios riĩ ño eriqui nguiã jurar i. —Ũquĩ nda asaã eã, i aroneate cote, jurar ire nyii. ¹⁷—Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene. ¹⁸Dios “mbae tasaã jëje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguiã nanderaarõ turãte nandeso mose eriichã. —Taemingo bei, i mose Dios nande je, ucheẽ nda embuchebiã. ¹⁹—Dios ra semingo bei ibate ucheẽ nguire, nande equia

ã. Nande ùquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios riichã sacua no. Eĩ nande chõ nguia nande abe Dios riichã, nande eicua mose. ²⁰Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderĩ pe. Sã sacerdote riqui ñee turã mbei Dios je mbia riĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

Jesús i tuchi sacerdotes ataque si

7 ¹Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec que esobeishĩ oso ra. Melquisedec que bendecir i ee ra. ²Abraham ngue el décimo mee Melquisedec je ra. “Ererecua Turã” i chõ nguia “Melquisedec” i mose. “Mbia mingó turãsa nyiese” i abe chõ nguia “Melquisedec” i mose no. “Mbia siqui turã nyiese” i chõ nguia “Salem” i mose no. ³Melquisedec si eãte que ra. Eru eã abe no. Erameĩ mo eã abe no. Mano eã mbei que ra. Nyebe eriqui nguia Jesucristo rã mbei co. Sã Jesucristo riqui beite sacerdoterã co no.

⁴Melquisedec quia rei i tuchi Abraham si. Abraham quiatu ngue el décimo mee nguia ee. Ae emee ee décimo sacua nda. ⁵Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no. ⁶Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷Ae bendecir i nae, aque quia rei i tuchi bendecir i ji si. ⁸Ae mbia décimo isi isi quia uataque si ã nae, mbiachõ ño ùquĩ nde. Ùquĩ mano arondete. Melquisedec quiatu que mano eã mbei ra. ⁹Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. Ùquĩ décimo isi isi raque nguesenda si. ¹⁰Abraham ngue ùquĩ i ja ra. Eriiriã ndaque nyii, décimo mee mose Melquisedec je.

¹¹Sacerdotes riqui mose que Dios ucheẽ mondo rei judíos je ra. Sacerdotes mbia mingó turã aroneate Dios rese. ĩ nda Jesús tu ãte rei. Ae quia ñi tu nguia sacerdote bei nonde cote. Melquisedec na sí. Aarón na eã. ¹²—Sacerdotes ra nyuuru uru eã ngõngue rendaque re cote, i que Dios aque mose cote ra. —Jesús miĩ nda siqui sacerdoterã mbei cote, i que Dios cote ra. ¹³⁻¹⁴Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquĩã ndaque sacerdoterã cose. —Ùquĩ mo sacerdoterã aroneate, i rei que Moisés nyii ra.

¹⁵Sacerdotes cose ndare rã eã ño Dios Jesús mii nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei. ¹⁶Moisés chimbesa rui si eã ño Jesús riqui nguiã sacerdoterã co. Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷Sã Dios ñee ee embesa ji rese no:

Nde quiatu ereico bei nguiã sacerdoterã mbei co.

Melquisedec na si,

sã Dios i ñee ee no. ¹⁸—Sacerdotes ra nyuuru uru eã ngõngue rendaque re cote, i que Dios aque mose cote ra. Ûquĩ nguiatu ngue mbia mingo aroneate nguiã Dios rese. ¹⁹Moisés chimbesa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰⁻²¹—Sacerdoterã nde, i mose emo je nyii, emo ngue jurar i âte quia ra. Dios Jesús mii mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.

“Nde quiatu ereico bei nguiã sacerdoterã mbei co.

Melquisedec na si”,

i que Dios cheẽ huĩ embesa ji rese ra. ²²Ae contrato Dios saã mbia je nyii nae, ùquĩ contrato que mbia mingo eã Dios rese ra. Ae contrato Dios saã Jesús riĩ namo nae, ùquĩ nguia rei eturã tuchi nande je namo cote.

²³Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴Jesús quia siqui nguiã sacerdoterã mbei co cote. Emo nda chĩ eã mbei euru erendaque re emo mose cote. ²⁵Ae ra Dios siichã Jesús riĩ nae, ùquĩ nda Jesús mingo bei tuchi. Jesús quia siqui beite nguiã co, ñee turã sacua Dios je ùquĩ nii.

²⁶Ae chõ sacerdote turã tuchi riqui nguiã nande je co cote. Dios rã tuchite quia ae re. Eicua jiri jiriãte quia ñene. Mbae turã achõ ndese chõ eriqui nguiã. Mbae icua ngue embiicua aronea tuchi quia ra. Ae quia ibatenda rerecua tuchi riqui nguiã namo co. ²⁷Jesús quia rei sacerdote rerecua ataque rã eã tuchi. Ûquĩ nguiatu ticuas quishĩ quishĩ mbeite nguiã sacrificio raã naa. Dios eicua mbutiã sacua esi. Mbia abe icua mbutiã sacua esi. Jesús quiatu ngue ticuas mo quishĩ eãte nguiã sacrificio raã emo mose. Ae sí chõ ngue mano nguiã sacrificio raã sacua. Mbia icua mbutiã ja sacua ño ngue mano nguiã aque mose. ²⁸Mbiachõ ño ngue sacerdote rerecua ja ñiinda ra. Ûquĩ ngue mbae turã saã mbei aroneate quia ra. Dios quiatu que Jesús mii sacerdoterã mbei cote ra. Ae quia mbae icua saã jiri jiriã tuchi nguiã.

Dios contrato yasu saã Jesús riĩ

8 ¹Ababi tuchi quia rei Jesús siqui mose sacerdoterã. Sacerdote turã tuchi quia rei ae nande je. Hue eñi ngoi Dios Ibatenda ribisho qiti nande je huee. ²Hue eriqui mbae raã naa Dio s chuchua ibatẽndaa huee.

Dios ae chisaã tuchi chõ hue tuchua re. Mbia mo nyisaã eã ño ñene. Nyebe Dios chuchua tuchi chõ hue re. ³Sacerdote rerecua ja chõ sacrificio raã naa sacuaã nde. Nyebe Cristo abe sacrificio saã nguiã umano mose. ⁴Ae sacrificio Cristo saã nae, ùquĩ nguia eturã tuchi sacerdote chisaã si re. Cristo siqui mose íbii, eĩ nda sacerdote eãte rei ae. Moisés chimbesa cheẽ ndui achõ ño sacerdotes ibi jenda riqui nguiã sacrificio raã naa ã. ⁵Ae sacerdotes ibi jenda saã saã nguia mbae nae, ibei jenda rese aba mundua sacuaã ño ñene. Sã Dios ñee Moisés je Dios chuchua ao nonde no. —Ndeico mose ibi íbátee que sechuchua ibei jenda atacuquia ndeje, ùquĩ na si chõ sechucharã ibi jenda esaã, i que Dios ñee Moisés je ra. ⁶Ae contrato Dios saã mbia je nyii nae, mbaranquiataũte que ùquĩ nda. Ae contrato Dios saã nande je namo Jesús rii nae, eturã tuchi chõ ùquĩ cote re. —Ã tasaã jẽje. Ñ abe tasaã jẽje no, i tuchi Dios quia contrato namonda rii nande je co. ⁷Contrato ñiinda mbia mingo bei mose Dios rese, i nda contrato yasu raã eãte rei nande je. ⁸Dios ia eãte que eriqui mbia aque mosenda rese ra. Sã embesa ji riqui no: Ñ ño ngue Dios ñee nguiã: Contrato yasu ra asaã je Israel jenda je. Judá jenda je abe no. ⁹Contrato asaã nguia ùquĩ namei je nyii nae, ùquĩ contrato rã eã nda eyasu asaã cote. Mbia arao quia Egipto si nae, ùquĩ mosenda rã eã nda contrato asaã je mbia namondo je. Mbia cose ndare chõ ngue contrato saã iru seje resẽ. Contrato raande que secheẽ mumba mumba chõ nda. Nyebe ùquĩ asecha chõ nguiã, i que Dios ra. ¹⁰Ae contrato ra asaã je Israel jenda je, ã ndei e ã: Secheẽ nda amii tuchi eãquĩ ndese. Secheẽ nda amondo tuchi echiangui re. Se ra ererecua turã tuchi ee. Serimba tuchi ra ùquĩ. ¹¹Seicua ja tuchi rae. Mbia cuasu ja. Eñetẽ abe ja chee. Seicua ja mose, ùquĩ mose emo uataque mbaaquiato quiato aroneate seriĩ cote. Seicua ja tuchi quiatu ra aque mose. ¹²Ûquĩ icuã nda ambutiã ja esi. Atesarei bei ra eicuã si, i que Dios cheẽ huĩ embesa ji rese ra. ¹³—Contrato yasu tasaã, i que Dios cote ra. Contrato ñiinda imate quiatu ngue ee re. Mbae ima nda ua ja cote.

Cristo rei sacerdote tuchi cote; sacerdotes ñiinda rã eã

9 ¹—Eĩ jenye jenye bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi

jenda riĩ ño eriqui nguiã ñee, “sechuchua” i mose. ²Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que hue cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chi huee no nda. ³Cortina mbucheseco ji que siqui tuchia ite rĩ nda. Aque quitera quti que cuarto nongue ñi nda. Lugar Santísimo, i que hue cuarto je ra. ⁴Huee que altar mo ñi oro ao ji ra. Mbae shimbu turã ndei sacua. Ira ao ji mbae riru mo abe que chĩ huee ra. Oro quti ji resebe que ra. Contrato Dios cheẽ mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye ra. Mbichae resebe que eñi nda. Maná i equia ee. Aarón chitochokuia ruri abe que chĩ mbae riru imi ye no nda. ⁵Angeles raanguia ao ji que chi ibate mbae riru arõ nda. Querubines, i que ũquĩ je ra. Ujeo que embiitee u mbae riru arõ nda. Sacrificio renda rei mbae riru. Ũquĩ cuartos nyeremo jenda asenei ja aroneate jėje namo.

⁶Aque mose que sacerdotes riqui ique ique bei cuarto eiquesa ji ra. Mbae raã naa sacua Dios je. ⁷Cuarto cortina quitera quitinda quiarei mbia mo ique aronea tuchi. Sacerdote rerecua miĩ ño ngue i que quia huee ra. Ique chiibe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huiique mose huee ra. Dios eicuã mbutiã sacua. Mbia icua abe mbutiã sacua. ⁸Aque mose bei que mbia mo ndiqui ique aroneate Lugar Santísimo nda. Dios riichã tuchi sacua. Ũquĩ ndese Espíritu Turã ndiqui urembiirandute ã. ⁹Sacerdotes que ticuasú iquia iquia tuchi rei quia aque mose ra. Ũquĩ ngue mbia chiã mbitirõ eã mbei chõ nda. Mbia mundua ndua sacua Cristo ruqui rese chõ ngue ũquĩ nda. Ũquĩ nandeicuate quia ã cote. ¹⁰Contrato ñiinda que mbia mingó turã aroneate quia ra. Mbae riĩ achõ ño ngue eriqui nguiã ñee. Mbaeiaie riĩ. Mbia chiũ riĩ. Mbia chimbei riĩ. Mbia choita riĩ. Ũquĩ niĩ ja. Ũquĩ ñee ndui sí chõ ngue mbia riqui rei nguiã nyii. Cristo tu nonde.

¹¹Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae miĩ ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiã mbae raã naa nande je pe. ¹²Cristo quiatu ngue ticuasú ruqui sii sii eã u nguiã nande je. Chivo ruqui abe. Nguqui ae je chõ ngue nandeicua mbutiã nguiã. Mano miĩ ngue mbia ja je ra. Mbia mingó bei sacua cote. ¹³Ticuasú ruqui que mbia mbitirõ tirõ ndei quia sacerdote je ra. Chivo ruqui abe. Ticuasú riirĩ ndaque rei ji cusubu abe no. ¹⁴Cristo ruqui quia rei equirãcuã tuchi ũquĩ mbae ruqui sí. Cristo ruqui miĩ nguia rei nandendua nduasa mbitirõ tuchi. Ae ruqui miĩ nguia rei nandemingo turã Dios reco rese. —Se ae tamano mbia icua mbitirõ sacua. Mbia mbae turã naa naa sacua Dios je cote, i que Cristo mano nda. Mbae icua mo ngue esaã jiri jiriã tuchi ra. Espíritu Turã ngue siqui tuchi erese emano mose ra.

¹⁵Cristo que contrato yasu saã nande je cote ra. Dios chiirabo eriichã tuchi sacua cote. Dios chiirabo siqui tuchi sacua erese Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ùquĩ icuã mii ngue Cristo mano nda. ¹⁶Ae contrato Cristo saã nande je nae, testamento chõ ùquĩ nde. Sã emo testamento mbesa no. Testamento raãsa mano mose, aque ramo mose chõ testamento valer i nguiã cote. ¹⁷Testamento raãsa manoa mose, testamento chõño ño aque mose re. ¹⁸Dios contrato ñiinda raã namo mose que ticuasú iquia uquia mbia je ra. ¹⁹Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isí chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no. ²⁰Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacua jẽje, i que Moisés ñee mbia je erii rii cote ra. ²¹Aquere que Dios chuchua abe rii rii cote ra. Dios chuchua teiqui renda abe que esii sii no nda. ²²Contrato ñiinda mose, mbae ruqui achõ je chõ ngue Dios riqui nguiã mbia icuã mbutiã esi. Dios que mbia icuã mbutiã choõño eã nda. Mbae quishĩ mose bei quiatu ngue eriqui nguiã mbia icuã mbutiã mbei esi.

Cristo mii aba icuã mbutiã

²³Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitirõ sacua nda. Ibatenda quiatu que embitirõ eã mbae ruqui je ra. Cristo ruqui mii je quiatu que ra. ²⁴Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderĩ huee. ²⁵Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacua mbae ruqui je. Nguqui j e eã ño ñene. Cristo quiatu que mano mii nda. Nguqui que eichusẽ tuchi nande je ra. ²⁶Cristo que tu mii ibi ra. Mano mii sacua nande je. Nandeicuã mbutiã sacua. Mbae ua serĩ mose que eru mano aa ra. Mano nyiibeĩ ibei eã equia co. ²⁷Sã mbia riqui mano mii no. Sã Dios riqui ecuata mee aquere no. ²⁸Eĩ si que Cristo mano aque mii no nda. Mbia icuã ja mbutiã sacua esi. Cristo ra tu si íbii emo mose. Aque mose ra manoa mbia icuã ndiquicharõ cote. Uquiato mingo bei sacua nguiatu ra eru. Ae esaarõ arõ nguiã nae, ùquĩ mingo bei sacua.

10 ¹Moisés chimbesa que mbia mingo turã eã ndaque ra. Mbia mundua ndua sacua Dios riiĩ mano ndese chõ ngue re. Ticuasú mbia quishĩ nyiibeĩ ibei rei quia nae, ùquĩ nduqui que mbia mingo turã eã no nda. ²Ùquĩ mbia chiã mbitirõ mbei mose, eĩ nda sacerdotes equishĩ

nyiībei ibei āte rei. Eĩ nda ticuasú miī quishĩ ndei mbia mbitirõ ja sacuā. Eĩ nda mbia tesarei rei huīicuã si. ³Mbia ticuasú quishĩ nyiībei ibei mose, ũquĩ ngue embutesareiãte huīicuã si ra. Munduate quiatu que huīicuã ndese ra. ⁴Ticuasú ruqui ra mbia icuā mbutiã eã mbei. Chivo ruqui abe no.

⁵Cristo ruqui miī nguiatu mbia icuā mbutiã nguiã esi co. Sã Cristo ñee Dios je siqui mose fbi no:

Ticuasú ruqui mbia mbitirõ eã mbeite quia ndeje co.

Nyebe que serete eremee seje ra.

Se mano sacuā mbia icuā niī.

⁶Mbae raaque rei ji abe ndebiãte.

Ticuasú mbia quishĩ quishĩ nguia huīicuã niī nae, ũquĩ abe ndebiãte no.

⁷Nyebe ngue acheẽ nguiã ndeje: “Ae ndebite nae, ũquĩ ndese seico sacuā ño ngue achu nguiã.

Sã embesa ji riqui ñee seriĩ no, ũquĩ ñee nguire que achu ra”, ae que ndeje ra,

i que Cristo ngu je ra. ⁸Nyebe Dios biãte riqui nguiã sacrificios. Mbia ticuasú quishĩ quishĩ mose huīicuã niī. Mbae raaque rei ji abe ebiãte no. —Ũquĩ jesaã saã, i raque Moisés chimbesa huĩ. ⁹—Ae ndebite nae, ũquĩ ndese seico sacuā ño ngue achu nguiã, sã Cristo i Dios je no. Mbia mbui sacuā sacrificios raã naa si chõ ngue eru nguiã. Sacrificio miī tuchi que esaã u mano mbia icuā niī nda. Cristo ruqui miī ño mbia icuā mbitirõ mbei nguiã co cote. Sacrificio raã i i rocoĩ. ¹⁰Ae Dios bite nae, ũquĩ ngue Jesucristo saã tuchi u ra. Mano mose mbia ja icuā niī. Mano miī tuchi que u ra. Nanderirõ mbei que nandeicuã si cote ra. ¹¹Sacerdotes riqui beite raque Dios chuchua ã. Ticuasú equishĩ nyiībei ibeite raque quia mbia icuā mbutiã sacuā ã. Ũquĩ nda mbia icuā mbutiã eã mbei. ¹²Jesucristo quiatu que mano miī aque mose bei ra. Mbia icuā ndiquicharõ sacuā ño ngue re. Aquere eñi ngoi bei Dios ribisho quti nande je hue. ¹³Pe eñi ngoi beite Dios jii pee. Ererecua tuchi ra Dios rese cote. Uquirãcuã nda eteacuquia tuchi chee uquiatoã je cote. ¹⁴Sacrificio miī ngue esaã nda. Aque miī sacrificio je que uquiato chiã mbitirõ ja bei ra. ¹⁵Sã Espiritu Turã abe riqui ñee ũquĩ no:

¹⁶Ae contrato ra asaã je judíos je nae, ã ndei e ã:

Secheẽ nda amiī tuchi echiangui re.

Secheẽ nda amiī tuchi eãquĩ ndese no.

¹⁷Atesarei bei ra eicuã si,

i que Espiritu Turã nda. ¹⁸Dios nandeicuã mbutiã mose, mbae mo nandequishĩ aroneate quia nandeicuã ndiquicharõ ã cote.

Dios nandesiīchã na

¹⁹Nande abe quiatu Dios nandesiīchã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique

Diósaa. Jesucristo ruqui riñ nandei que Diósaa. ²⁰Cristo rete rei cortina mbucheseco ji rã. Cristo rete mano mose, cortina abe que embui ra. Nyebe nandeico ique arõte Dios rea Lugar Santísimo ã cote. Cose ndare rã eã tuchi chõ cote re. ²¹Jesucristo miñ ndei sacerdote tuchi nande je cote. Dios quiato ja je cote. ²²Diósaa ra nandesiquicheã ique oso cote. Nandechiã turã ño nandeico oso Dios riichã. —Dios ra nandei turã, nande chõ nguia nandechiangui re. Cristo quiatu ngue nanderii rii nguia nguqui je nyii. Nandeicuã mbutiã sacua nande si. I turã je que nanderei ra. ²³—Taemingo bei, i que Dios nande je ra. Ñeende ùquĩ nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, i. ²⁴Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembuchesequa turã nguiatu quia nyiese. Mbae turã nandesaã uquia bei quiatu quia nandenongue je. ²⁵Cristo quiato ñumunua nua mose, nandetesareiã mbei quiatu quia ñumunua nua. Sã emo emo ndiqui ñumunua nua eãte no. Cristo nandehosei uquia uquia bei quia nanderesenda je. Achite quiatu Cristo ñi nguia tu a.

²⁶—Mbae icuã tasaã, nande i i mose Jesucristo icuare, emo nda manoa nandeicuã ndiquicharõ cote. ²⁷Ūquĩ mose, mbae icuã nda nandesaã tuchi. Ūquĩ mose, nandeso chee ra tata cuásuu no. Huee ra Dios ucuâyãsa nyoĩ ja. ²⁸Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbiam que etiisu isu eã tuchi eiquia ra. ²⁹Dios riirĩ ucuâyãsa quia ra mbae rasi saã tuchi ūquĩ si. Cristo ruqui ucuâyãsa abe no. Ae Espiritu Turã isiteã teãte quia nae, ūquĩ abe no. Cristo ruqui je quiatu ngue Dios ūquĩ miñ ndei nguia icúe. ³⁰Sã Dios ñee no: —Se ra mbia icuã asibishorõ mbae rasi je, sã i no. —Dios sí ra mbae rasi saanguquia ngũimba je, erimba icuã mose ee, i abe que embesa ji huĩ nda. ³¹Ae ra Dios mbasi eicuã niñ nae, mbasi tochi eã ndae. Aba mbusiquiche tuchi chõ ūquĩ nde.

³²Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbiracuã mingue que equia aque mose ra. Ūquĩ ndese jendua jiri ae. ³³Mbia que ñee icuã icuã tuchite quia jemo je ra. Mbiam que mbae rasi saanguquia tuchi quia jemo je no nda. Mbiam tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra. ³⁴Jẽya eãte que eriqui mbiam tarõ ji rese ra. Mbiam jembae rirõ ndirõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei. ³⁵Dios jẽicua bei quiatu quia aque mosenda rã mbei. Ūquĩ mose ra Dios mbae turã tuchi mee jẽje. ³⁶Ae Dios bite nae, ūquĩ ndese bei chõ jẽingo. Ae mbae turã nda Dios mee jẽje nae, ūquĩ jẽsaarõ arõ mingue chõ nguia

cote. ³⁷Achite Jesucristo ñi tu a. ³⁸Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra hui Dios si nae, Dios ia eã tuchi ra erese. ³⁹Nande quia ra nandehui eã mbei esi. Ae ra hui esi nae, ùquĩ nda Dios mbutiã. Nande quiatu Dios nandeicua tuchite nguiã ã. Nyebe ra nandemingo bei.

Ae Dios icua

11 ¹Emo Dios icua mose, ¿mbae chõ ùquĩ ña? Ae Dios icua nae, ùquĩ nda ñee. —Ucheẽ nguire ra Dios mbae mondo seje, i rae. —Ae asarõ arõ nguia nae, ùquĩ nda emondo seje ucheẽ nguire no, i ra eno. Mae eã ndaque erese. ²Dios quiato cose ndare que Dios icua tuchi quia ra. Nyebe mbia riqui nguiã jirandu jate erese. ³Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandeicuate quia ã. Nandemae ãte raque erese.

⁴Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caín mbae si ra. Nyebe Dios embae ofrenda isi turã nguiã. —Co eturãte riqui seje co, nyebe Dios i nguiã Abel nii. Nyebe mbia riqui nguiã jirandu jate Abel rese. ⁵Enoc que Dios icua ra. Nyebe Dios ererao nguiã ibate emano mose rocoĩ. Mbua mbuate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc nii nyii reaẽ. ⁶Emo Dios icua eã mose, ùquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios riichã mose, Dios turãte ra ee, sã i quiatu no. Aquere quiatu ra Dios eisi turã cote. ⁷Noé que Dios icua ra. —Ama nda uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguiirĩ mingue sacua eye. Mbua ataque que Dios icua eãte quia ra. Noé mii ño ngue eicua quia ra. Nyebe Dios Noé isi turã nguiã.

⁸Abraham ngue Dios icua ra. Nyebe Dios cheẽ mumbayã nguiã. Dios que ñee ee ra. —Eso rã a si. Ibi mo tamee ndeje mámbii, i que Dios ee ra. Abraham ngue Dios cheẽ mumbayã oso ra. Ae quiti esi nae, jiranuate raque erese nyii. ⁹—Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huee ra. Nguiirĩ ndese. Isaac. Jacob abe no. Ùquĩ je abe que Dios ñee nda. —A ibi tamondo jẽ abe je, i. ¹⁰Abraham quiatu que Dios icua tuchi quia ra. Nyebe ñee nguiã. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra. ¹¹Abraham ninisi abe que Dios icua ra. Sara, i equia ee. Nyebe que nguiirĩ ndea Dios cheẽ nguire ra. Ari tuchite rei que ae ra. —Dios ra seriirina mee seje ucheẽ nguire, i quiatu que equia Dios icua ra. ¹²Amei tuchi raque Abraham, Dios eriirina mee mose ee. Mbua tubiriã i

tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quiishĩ tubiriãte riqui no.

¹³Ūquĩ ngue mano ja Dios mbae mondo ja eã mose ee ra. Ae je “co tamondo jêje” i Dios ee nae, ūquĩ ndurubi quã ño ngue mano nda. —Dios ra emondo ure je uremanonde, i que eyate quia ndua ndua ūquĩ ndese ra. Ūquĩ nguiatu que Dios icuate quia ra. —Nandeico mbirĩ ndaque equia íbii ã. Ibatenda chõ nande re, ite que equia eicua ra. ¹⁴Emo ñee mose ūquĩ, siqui sete quiatu nguiã Dios récuua. ¹⁵Ūquĩ ndua ndua mose nguecua rese nda nyoi si nyebi re chã ae. ¹⁶—Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ūquĩ ndecua turana quereco co.

¹⁷—Ma Abraham secheẽ mumbayã, i que Dios Abraham niĩ nda. —Nderiirĩ equia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiirĩ miĩ niĩ. ¹⁸—Isaac nda tiirĩ tuchi ndeje, i rei que Dios ee nyii ra. ¹⁹Abraham ngue Dios icua tuchite quia ra. —Dios seriirĩ mbuquera arondete se equia mose nyii, i que ndua ndua uchiangui re ra. Abraham nguiirĩ iquia serĩ mose que Dios eo isi ra. Abraham Dios cheẽ mumbayã mose, nguiirĩ iquia raanguia chõ ngue re. Dios embuquera si raanguia chõ ngue eno nde. ²⁰Isaac que Dios icua ra. Nyebe ñee nguiã nguiirĩ je. —Dios ra mbae turã saã jêje, i que Jacob je ra. Esaú abe je. ²¹Jacob que Dios icua ra. Nyebe ñee nguiã José riirĩ ja je umano serĩ mose. —Dios ra mbae turã saã jêje, i que ee ra. Uchitochoquia rese que nyeco rei nyibi ñee turã Dios je ra. ²²José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequiangue abe jendao a si, i que israelitas je ra.

²³Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua equia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe. ²⁴Moisés s abe que Dios icua quia aquere cote ra. Nyebe “Egipto jenda rerecua riirĩ nducucha eã se” i nguiã. ²⁵“Dios quiato rese taico se. Mbia icua icua ndaque ra seje. Dios quiatoã ndese ra aicoã”, i que Moisés ucuasu mose cote ra. Mbae icua ndese aba oote raque. Aba mbia mbirĩ ño ñene. ²⁶—Taico chõ Dios rimba rese. Mbia ra sembasi mbasi raque Cristo riĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷Moisés que Dios icua ra. Nyebe esi nguiã Egipto si. Siquiche ãte ererecua paama i si. Nĩmbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jêiquesa ja jêsii sii. Ī nda ángel jendiirĩ i iquia eã, i que Moisés ñee mbia je ra. Angel que israelita riirĩ mo iquia eã tuchi cote ra.

²⁹Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandesos iasa emombita, i rei que Egipto jenda abe ra. I que tuchõ eati eiquia ja ra. ³⁰Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee. ³¹Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ùquĩ ndese. Rahab que Dios quiato isi turã nda. Mbuchemi ngue ererecua icuã si ra. ³²¿Aba riĩ abe ra aba ñee jêje re? Dios quiato tubiriãte quiatu ñene. Ñquĩ asenei ja aroneate jêje. Gedeón. Barac. Sansón. Jefté. David. Samuel. Dios cheẽ mbuchecuada ja riĩ. ³³Ñquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que etequiatu quiatu bei quia nyacua mbaba mose abe ee ra. ³⁴Ñquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que etequiatu quia ùquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacua. ³⁵Cuña abe que Dios icuate quia ra. Nyebe Dios eririĩ ndaque mbuquera sí nguiã ee. Emo emo abe que mbae rasi saãte quia Jesús riĩ nda. Hui sereãte quiatu que equia esí ra. —Sã seiquia rei. Dios ra sembuquera sí nguiã. Serete mbuchiicua bo turã ndae, i que equia ra. ³⁶Emo emo ngue ñimbirãcuã nguia mbia iquia iquia chooño mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios sí ra. ³⁷Emo emo ngue mbia iquia iquia rei sita je no nda. Tiquise je abe que eriqui rei eiquia iquia ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios sí ra. ³⁸Ñquĩ ngue eturã tuchi mbia ataque sí ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda. ³⁹Ñquĩ ngue Dios icua tuchite rei quia ra. —Mbae turã tamondo jêje, i rei Dios quia ee nyii nae, mee jei eã ngue ee ra. Mee je quia ra ee cote. ⁴⁰Ñquĩ mii je eã nda Dios mbae turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ùquĩ ndese.

Jesús mii ndese nandendua ndua

12 ¹Sã Dios icuasa tubiriãte cose no. Ñquĩ na ño nandeico nande abe Dios icua tuchi. Ae nandembuti mbuti quia Dios

si nae, ũquĩ si nandehui. Ae mbae icuã aba mbuchiishĩ arõte quia nae, ũquĩ si nandechiicuasẽ ño. Jesús miĩ ndui chõ nandeico ngata. Nandechimbirãcuã ño nguia siqui erese. ²Jesús miĩ ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireĩte raque uquĩ. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³Jeñimondochote chĩ nda siqui mose Dios rese jẽ. Sã Jesús no. Mbia icuã icuã mose ee, ñimbirãcuã mbei que equia ra. Ñimondochote eã ngue ra. ⁴Jesús miĩ ngue mano mbae icuã ndiquisã quisã sacua mbia si ra. Jẽingo mose mbae icuã ndiquisã quisã, aba mo ngue jẽiquia eãte jẽ nguia ra. ⁵¿Embesa ji si jẽtesarei chõ nde? —Seriirĩte quia jẽ nde, ite Dios quia jẽje co. Sã embesa ji riqui ñee ã no:

Seriirĩ, Dios mbae rasi saanguquia mose ndeicuã niĩ, ereisiteã teãchĩ nda jẽ.

Dios ñee mose ndeje ndeicuã niĩ, echeẽ eisi turã ño.

⁶Ae rese Dios nyesecua nae, mbae rasi ra esaanguquia ee eicuã mose.

Ae Dios isi nguiirina nae, ũquĩ je ra ñee eicuã niĩ, i que embesa ji huĩ ñee nda. ⁷Dios “seriirĩ” i tuchi quia jẽje co. Nyebe eriqui nguia mbae rasi raanguquia jẽje jẽicuã mose co. Sã mbia ja riqui nguiirĩ iruã eicuã mose no. ⁸Dios mbae rasi raanguquia eã mose jẽje, eriirĩã nguia ra rei jẽ. ⁹Sã nanderu ibi jenda riqui nanderuã nua nandefetẽ mose no. Nandembaaquiato sacua. Sã nandeico echeẽ mumbayã cote no. Eĩ nande sí chõ Paba ibatenda je. Ae cheẽ nguia nandemumbayã tuchi. ũquĩ mose ra nandereco siqui turã tuchi. ¹⁰Sã nanderu ibi jenda riqui nandembaaquiato jua raque no. Nandeico turã sacua aa íbii. Dios quiato nandembaaquiato turã tuchi nguia nanderu ibi jenda si co. Nandechiã mbitirõ sacua ae rã si. ¹¹Dios mbae rasi saanguquia mose nande je, nandehosei chiãte raque. Erasite quia ñene. Aquere quiato ra nandechimbitirõ cote. Aque mose quiato ra nandeya cote.

Dios cheẽ nda jẽisiteã teãchĩ jẽ

¹²Jẽo tomei jembirãtã jiri ae. Jẽtima abe jembirãtã jiri siqui sacua Dios rese no ae. Jeñimondochoteã jiri quia siqui Dios rese ae. ¹³Jẽingo tuchi quiato quia erese. Ae ndua ata atate quia nae, ã nda ũquĩ abe siqui tuchi chee erese chã. ¹⁴Jẽingo turã mbia ja rese. Dios rã si chõ jẽingo. Dios rã si nandeicoã mose, nandemaẽ eã mbei ra erese. ¹⁵Jenyitequiato turã ño nguia. ã nda jemo Dios turã isiteã eã. Emo mbae icuã naa mose jẽje, jẽtesarei chõ esi. Jendua icuã icuãchĩ nda jenongue riĩ jẽ. ũquĩ mose ra jeñimbiicua jate. ¹⁶Jeninisi ae rese chõ jẽingo. Jemo nda siquichĩ emo ninisi rese jẽ. Dios mbae ra jẽisiteã teãchĩ jẽ. Sã Esaú no. Aque que umbae

herencia mundo ja chō soo ñetē ndibishorō nda. ¹⁷Aquere que “sembae herencia taisibe” i rei nyeseo tuchi ra. “Bendecir ere rā seje”, i rei que ngu je ra. Eru que teā teā ño ee echeē mose ra. Nyebe Esaú nyeseo tuchi nguiā cote.

¹⁸Dios turā tuchi riqui jēje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirā pirirā i tuchi quia ee aque mose ra. ¹⁹Trompeta que nyuihuiu ee no nda. Dios que ñee ee cote ra. Mbia que Dios cheē ñandu sereāte ra. ²⁰Dios quiatu ngue ñee nguiā nyii: —Emo oco mose sita ibate rese, ũquĩ jēiquia. Mbae quiaa riinda abe oco mose erese, ũquĩ abe jēiquia no. Sita je jēiquia. Jeñio no ae, i quiatu que Dios ee nyii ra. ²¹Aba mbusiquiche tuchi que mae mose ũquĩ ndese ra. —Aico titi titi i tuchi esi co, i chee que Moisés abe ra. ²²Ei jenye eā ño jē nde. Dios jembusiquiche āte quia jē co. Dios recua jēsiichā tuchi quia jē ā. Dios reco chuchua. Jerusalén naanguia ibatenda jēsiichā tuchi quia jē ā. Angeles tubiriā abe jēsiichā tuchi quia ā no. ²³Dios icuasa ñiinda abe jēsiichā nguia ā no. Ũquĩ mbae nombres mbesa ji chī ibate pe. Dios abe jēsiichā nguia ā no. Ae ra Jesús quiatoā icuā tea tea ja emo mose. Mbasi ja rae. Jesús quiato mano je abe chō jēsiichā ichā nguia ā no. Ũquĩ ngue Dios mbuturā tuchi cote ra. Eicuā jiri jiriā tuchi chō cote re. ²⁴Jesús abe chee jēsiichāte quia ā no. Ae ruqui riñ ngue Dios contrato yasu raā nande je ra. Ae ruqui rii rii ji jēsiichā nguia ā. Ae ruqui quia rei eturā tuchi Abel ruqui si.

²⁵Dios riqui ñee jēje co. Echeē nda jēsiteā teāchī jē. Dios que mbae rasi saanguquia mbia je cose ra. Echeē nenei neneisa andu sereā mose a íbii. Ibatenda riqui ñee nande je co. Ae cheē nandechandu sereā mose, mbae rasi ra esaanguquia tuchi nande je cote. ²⁶Dios cheē mose que ibi nyere nyere aque mose coose ra. —Namo nda ibi ambuchere si no. Ibi mii ño eā nda ambuchere. Ibei abe ra ambuchere no. Aque mii nda ambuchere cote, i Dios quia co. ²⁷—Aque mii nda mbae ambuchere ja, i Dios quia co. Aque mose ra mbae ua ja Dios chiao. Ae ra siqui bei, ũquĩ achō nda ua eā. Mbae ataque ra ua ja aque mose. ²⁸Dios rimba rei nande. Nyebe ra nande nandetiā aroneate. Gracias nande tuchi quiatu quia Dios je. Nandeico mingue chō nguia ee. Ũquĩ mose ra eya tuchi nanderese. ²⁹Mbia Dios cheē mumb a mose, Dios ra paama i tuchi ee. Tata rā tuchi chō Dios re.

Jenyesequa jenyiese

13 ¹Jenyesequa quia jenyiese jē. Nyiesenda chō jē nde. ²Mbia ngāē mose jenyuchúaa, jēisi turā ño nguia. Emo ngue ángeles mo isi turā uchuchúaa ra. Iranua ndaque erese. Mbia mo eriqui reñ nguiā ee. ³Etarō ji rese jēingo ndua. Mbae turā jēsaā saā ño nguia ee. Jētarō ji raanguia chō jē abe erese re. Ae je mbia icuā icuā ndiqui nae, ũquĩ je

jëingo turã ño. Sã jë abe jendete riqui no. Sã jë abe jëiruã nua arôte no. ⁴Emo siqui mose ngüinisi rese, ùquĩ Dios bite. Sã emo ngüinisi resechõ ño siqui. Sã eriquã emo ndese. Emo siqui mose emo ninisi rese, Dios ra paama i tuchi ùquĩ je. Ae ninisi äte riqui nae, siqui mose emo ndese, Dios ra paam a i tuchi ee no. ⁵Mbae isiquia rese ra jendua nduachĩ jë. Jembae mi ndese chõ jëya. —Jaendechayã mbei ra se, i quiatu Dios nguiã co. ⁶Ae bei jë. Dios ra nanderechayã mbei. Nyebe nandeico nguiã ñee:

Dios riqui beite serese co.

Mbia mo si ra asiquicheã,
nyebe nandeico nguiã i ã.

⁷Jenderecua rese jëingo ndua. Ùquĩ ño ngue Dios cheë senei senei jëje ra. Ùquĩ ndiqui Dios icuate ùquĩ. Eĩ jenye Dios icua jë abe ùquĩ na si. Ùquĩ nguia siqui turãte nguiã Dios rese ùquĩ. ⁸Eĩ mbei chõ Jesucristo re. Cose mosenda bei. Namu abe chee. Eĩ mbei ra ae quia. ⁹Mbia jembaaquiato ata ata mose, echeë si jëhui chõ. Mbia jembaaquiato chooño mose, echeë si jëhui chõ no. Ae je mbia riqui mbaeiaie i nande je nae, ùquĩ si nandehui mose, ùquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae chõ nandechiã mbuquirãcuã nguiã. ¹⁰Jesús mi ngue mano nande je ra. Sacrificio rei ae mi nande je. Cose ndare rã eã namu cote re. Ticuasu ra mano eã nandeicuã mbutiã sacua cote. Jesús ruqui mi ño nandeicuã mbutiã nguiã co cote. ¹¹Sacerdote rerecua riqui ticuasu ruqui rerao rao Lugar Santísimo aque. Dios mbia icua mbutiã sacua esi. Isho jiri sucha cuasu si echoi quia ticuasu roo rei rei aque. ¹²Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua nguqui je ra. ¹³Jesús que aba ireingua saã tuchi ra. Nande abe nandesiquicheã nguiatu quia aba ireingua raã erese. ¹⁴Nanderecua ibi jenda ra ua chõ. Dios ra nanderecuarã mee nande je ibate. Ùquĩ nguia ra ua eã mbei. ¹⁵Jesús que mano nande je ra. Nyebe nandechë turã mbei quia Dios je. Sã nandechuru riqui ñee turã mbei eriĩ. ¹⁶Jëingo turã ño nguia mbia je. Jembae jemee mee nguia emo je. Ùquĩ Dios bite.

¹⁷Jëingo turã jenderecua je. Echeë jemumbayã. Jenderecua riqui jendeaquiato quiatu Dios je ùquĩ. —¿Jeteaquiato turãte equia re? i chee ra Dios ee. Jenderecua cheë jemumbayã mose, eyate ra ùquĩ mose. Echeë jemumba mose, eya eãte ra jendese. Jë abe ra jëya eãte no.

¹⁸Jeñee mbei quia Dios je ureriĩ. Ureico turã sete equia mbia ja je ã. Ureico ndua icua icua eãte emo niĩ ã no. ¹⁹Jeñee tuchi quiatu quia seriĩ Dios je. Ì nda Dios semondo jei jendea.

Echeë hui bei

²⁰Dios ae aba mombia nguiã. Dios ae que Jesús raaque mbuquera si ra. Jesús ruqui riĩ ngue Dios ucheë yasu mee nande je ra. Jesús ruqui riĩ

ngue Dios embuquera no nda. Jesús rei oveja raarõsa rã. Nanderaarõ arõ mbei equia co. ²¹Sã Dios riqui jembuquirãcuã tuchi. Ì nda jëingo bei ae Dios bite ùquĩ ndese. Sã ae riqui tuchi nandechiangui re. Nandemingo tuchi sacuã ae ebite ùquĩ ndese. Jesucristo quiatote quiatu nande re. Sã mbia ñee turã mbei quiatu quia eriĩ. Amén.

²²Seresenda, aico co mbesa juate jembiirandu sacuã a. Secheẽ jemii tuchi rã jëaquĩ ndese. ²³Aico jembiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea. ²⁴Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jëje aque. ²⁵Sã Dios siqui turã jë ja je. Amén.